

豫章叢書

第一二四冊

宋

學

笑

書

卷之四

自鳴集

劉子琛書

已未仲夏  
刊於退廬

欽命四庫全書總目卷一百六十 集部 別集類

自鳴集六卷

永樂大典本

宋章甫撰考宋有二章甫一字端叔浦城人熙甯三年進士官至都官郎中著有孟子解義十四卷楊時爲作墓誌其文今載龜山集中一字冠之鄱陽人徙居眞州自號易足居士卽撰此集者也甫行事不概見惟張端義貴耳集有云張冠之名甫有文集十卷少從于湖交遊案于湖乃張孝祥之別號豪放飄蕩不受拘羈淳熙間淮有三士舒之張用晦和之張進卿眞之張冠之也據其

所述可略見其爲人其以章爲張蓋刊本字譌耳又陸游入蜀記稱乾道六年八月二十八日同章冠之秀才甫登石鏡亭訪黃鶴樓故址則甫蓋舉秀才矣其集不見於宋史藝文志文淵閣書目雖有其名而傳本久絕其得見於世者惟名賢小集拾遺所載湖上吟一首詩家鼎鑪所載寄荆南故人一首而已今檢永樂大典所收自鳴集詩句頗多其格律雖稍近江湖一派而骨力蒼秀亦具有研鍛之功觀其別陸游詩有平生相知貴知心道同何必問升沈之句謝

韓元吉寄茶詩有別公宛陵今五春渴心何啻  
生埃塵之句次韻呂祖謙見寄詩有山林舊約  
都茫茫憶君著書看屋梁之句是其所與酬贈  
者皆一時俊傑之士故耳濡目染尙能脫化町  
畦自成杼軸頗爲不墜雅音謹哀次釐訂析爲  
六卷至雜說三篇以禪家機鋒論道德仁義之  
旨援儒入墨是殆不得志於時者之肆志放言  
然其害理已甚今故附其說於集末而特加糾  
正以著其失焉

自鳴集目錄

卷一

五言古體詩五十七首

卷二

七言古體詩三十四首

卷三

七言古體詩三十五首

卷四

五言今體詩九十六首

卷五

七言今體詩四十八首

卷六

五言絕句二十首

六言詩十四首

七言絕句九首

雜說三首

自鳴集卷一

宋 章甫 撰

送馮圓仲入蜀

我本山中人早信雲無心卷舒隨清風或作三日霖  
十年江湖游復識水之性東西因地形圓折初無定  
卻來閱世人惟公多古風用舍不繫懷畧與雲水同  
還乘明月舟西泝弄流水雲水遠送迎鷗鷺皆知已  
我今與公別亦若雲水然相望渺江湖萬里同青天

送張寺丞

知己不易得相知貴知心我行遍四方公獨知我深

公如千丈松凜凜有直氣我如松下草亦有傲霜意  
公分刺史符謁來淮上州而我倦遊者振衣從公遊  
花月醉管絃江山隨杖屨激水洄窮愁逢人賞佳句  
政成公入覲酒盡客語離疊鼓催發船不顧邦人悲  
邦人勿深悲宣室定前席公必念爾民還陳治安策  
吾君自神聖事君公不欺祝公但加餐慰此邦人思  
送孫文輔尉新城

我來淮上居忽忽歲月過定交誰最久有唱君必和  
棊枰角勝負文字工切磋雲山結伴遊風雨對牀卧  
那知世途隘但喜客愁破出處方乃殊離別情無那

江城失益友山縣得良佐平生愛圖史晚歲職警邏  
袍鼓常不驚雞犬亦相賀強飯君勉旃功名看老大  
隱靜分題得靜字

平生苦愛閒多病復便靜每爲林下遊忽若醉而醒  
茲山昔曾登當暑毛骨冷碧霄環珮聲古木旌幢影  
五峯如高人一一各秀穎俗駕難久留佇立但俄頃  
別來三十載往往夢清境從公得再來共此春日永  
憑高愜幽思卽事發深省然燈戰枯棋臨水淪新茗  
興闌下山去妙處心已領曉雨濕籃輿衝泥度前嶺

古洗

古人不可見古物亦無幾今朝雙眼明乃識漢時洗  
規模簡而質彷彿古君子年深土銷蝕薄處僅如紙  
篆名可意逆依稀辨雙鯉傳寶今幾代是閱人多矣  
我生頗好古摩挲不能已悠然起遐思俗物一何鄙

納涼

大熱金石流日色亦可畏鄙夫先多病喘息僅存氣  
飲冰不救渴膚汗那容睡秋風幾時來不問黑貂敝  
林梢墮斜陽涼颿颿然至呼童吸井泉洒掃庭中地  
胡牀得露坐始覺有生意老妻破甘瓜兒女膝下戲  
鳴蟬雖強聒亦足代鼓吹坐久月照入金燈正澄霽

惜哉疲茶甚杯酒未敢置浮生能幾何荏苒忽中歲  
四時更代謝寒暑不可避幻身豈長存中有不遷義  
且享今夕涼百年安用計

和仲韓見簡韻

野人不愛名中歲益安命辛苦營一區婆娑只三徑  
那知錢有神但喜酒能聖翩翩趙公子時時在軒乘  
詩詞旣清婉筆力亦端勁傳家堅素守從仕傷直性  
語言生風波道路足機穽君猶沉下僚我亦抱多病  
時偷半日閒樂此一室靜賞月已失期登高况當令  
風物漸淒緊江山更幽夔何時城南樓曳杖可乘興

和韓文寄厓簿大雅并見簡韻

故鄉未可歸異縣難久留海深蛟鱷怒安得乘桴遊  
貧賤豈天意自下曲如鉤吾道未全窮三歲依賢侯  
小雞隨孔鸞顧影良可羞所喜臭味同潔已從清修  
邇來苦多病頗厭淮南州援琴操土風大類南冠囚  
今辰天氣佳和風吹微裘桃李競顏色誰能分劣優  
空攪遊子心浩蕩生春愁新詩忽到手盛意知難酬  
材生天地間小大固不侔詞鋒未易當如以楚伐鄒  
玉李更多文情義還相投他年內集時尙記野人不  
他年內集應呼我  
東坡與康國詩也

雷

三伏久不雨今辰忽聞雷殷殷地中出轟轟空際來  
電光倏先馳掩耳恐不及陰雲勢相交銷鑠畏毒日  
上天行號令君子敬天威端坐每深省整冠仍斂衣  
蒼生苦炎熱喘汗不可過寄聲謝豐隆爲起神龍卧  
秋雨未已客懷不佳夜誦少陵遣興詩至生涯  
能幾何常在羈旅中三復感喟增感每字賦

一詩

日月無停輪歲律今崢嶸夜長客無睡打窗秋雨鳴  
早寒逼衾裯兒女聲呶嚶令人愧老龐團樂話平生

借屋與僧隣局促僅如蝸悲秋懷抱惡頭緒如亂麻  
老來怕讀書隙風燈影斜感時思弟妹衰淚落天涯  
饑寒傍人門面目自可憎爲善得長貧天理疑難憑  
狂談取富貴易若階而升吾實畏鬼神勿謂吾無能  
愁陰錯昏曉北風振葭葦關塞來悲鴻戰場多哭鬼  
人生真幻戲歸盡同螻蝻貪夫患得失達者今無幾  
逆旅故人少今秋風雨多禾頭欲生耳農夫空悲歌  
饑腸望一飽螯螯同雁鵝臨風不把酒奈此菊花何  
門庭久沮洳蚯蚓升吾堂夜寒人閒寥蟋蟀鳴吾床  
屋頭兩株樹葉落滿僧廊騷人不須悲榮悴理之常